

# Qalam

KDN 186

---

---

143,    Muharram    1382,    Jun    1962,    60    sen.

---

---

## Muktamar Pertubuhan Islam Singapura Anjuran Pertubuhan Muslimin

Pertubuhan Muslimin Singapura telah merancang suatu Muktamar Pertubuhan-pertubuhan Islam di Singapura yang akan diadakan pada 10 Jun 1962 yang akan datang ini. Pertubuhan Muslimin yang menganjurkan muktamar ini telah meminta pertubuhan-pertubuhan Islam di Singapura menyertai muktamar itu dengan mengenakan bayaran sebanyak \$5.00 bagi tiap-tiap sebuah pertubuhan dan menghendaki atau mempelawa bagi tiap-tiap pertubuhannya itu membuat memorandum mengupas kertas kerja yang dibuat oleh Yang Dipertuanya U. Ya'cob bin Mohamed.

Di antara tujuan mengadakan muktamar Pertubuhan Islam yang dicadangkan itu, disebut oleh Setiausahanya di dalam siarannya kepada pertubuhan-pertubuhan yang dipelawa untuk menyertainya, ialah:

1. Berikhtiar menyatupadukan tenaga dan perpaduan pertubuhan-pertubuhan dan umat Islam setempat.
2. Berikhtiar mendapatkan kerjasama yang erat di dalam segala usaha untuk meninggikan taraf pemeluk agama Islam.
3. Berikhtiar, berusaha memajukan dan meninggikan syiar agama Islam serta memerlukan

perkembangannya.

4. Berikhtiar bagi mewujudkan suatu "Lembaga Pembangunan Masyarakat Muslimin" Singapura.

Tujuan-tujuan yang tersebut ini, jika diamalkan adalah sangat baik tetapi nampaknya, belum pun berjalan lagi pertubuhan yang menganjurkan "Muktamar Pertubuhan-pertubuhan Islam" ini, yakni Pertubuhan Muslimin sendiri tidak beramal dengan apa yang dimaksud di dalam tujuan-tujuan Muktamar itu.

Di dalam tujuan pertama sebagai asas sesuatu gerak dan usaha ialah bersatu padu. Kalau bersatu padu di atas nama dan perkataan sahaja tidaklah bererti tetapi bersatu padu hendaklah dengan amal dan perbuatan sekira-kira boleh mengikat atau menjadi teladan bagi tiap-tiap yang lain untuk memberi kerjasama di dalam menyampaikan tujuan-tujuan yang baik itu.

Untuk mengadakan perpaduan, menurut pendapat kita, tidaklah satu perbuatan yang bijak, Pertubuhan Muslimin yang masih muda itu terus sahaja mengadakan satu kongres yang bersifat umum. Kalau kongres diadakan hanya di antara badan itu sendiri dengan ahli-ahlinya, orang tentunya tidak akan berkata-kata atau akan menyebut-nyebut tetapi mengadakan suatu kongres atau muktamar untuk mencari kerjasama maka tentunya telah teradat dan kebiasaan hendaklah terlebih dahulu mengambil pendapat pertubuhan-pertubuhan yang lain sebelum mengadakan rancangan muktamar itu kerana kalau sekiranya seperti yang ada yakni terus sahaja Pertubuhan Muslimin membuat rancangan bersendirinya membuat Muktamar Pertubuhan-pertubuhan Islam dengan hanya mempelawa dan meminta disertai sudah barang tentu sifatnya boleh disifatkan semata-mata membelakangkan pertubuhan-pertubuhan Islam yang lain terutamanya yang lebih lama umurnya daripada

Pertubuhan Muslimin. Bagaimanakah cara ini hendak didapati sesuatu kerjasama – dengan ia sendiri tidak lebih dahulu menghulurkan tangan meminta bekerjasama dengan badan-badan yang boleh dibawa berfikir itu.

Jelasnya bahawa Pertubuhan Muslimin membuat sendiri lalu meminta tiap-tiap badan menyertainya dengan tidak lebih dahulu meminta kerjasama bahkan yang diminta hanya membahas kerta kerja yang dibuat oleh Yang Dipertuanya sahaja, U. Ya'cob Mohamed Setiausaha Tetap kepada Perdana Menteri Singapura.

Hal ini bertambah lagi apabila kita kaji kertas kerja yang dibuat adalah pada keseluruhannya meminta atau menuntut kepada kerajaan Singapura supaya mengambil persetujuan pegawai-pegawai dan kakitangan Muslimin di jabatan kerajaan, di perusahaan-perusahaan orang Muslimin dan seumpamanya untuk memotong satu peratus daripada gaji-gaji mereka untuk dijadikan *fund* yang bakal digunakan untuk biasiswa, sekolah-sekolah agama dan sekolah-sekolah rakyat. Gaji guru-guru agama dan guru-guru sekolah, masjid dan surau dan dewan Muslimin.

Segala usaha dan hasilnya adalah diserahkan kepada kerajaan dan suatu jawatankuasa dibentuk untuk mentadbirkan supaya terlaksana tujuan-tujuan yang tersebut. Melihat ini orang-orang pun akan bertanya:

Kalau ini sebagai satu syura untuk dilaksanakan oleh kerajaan mengapa Pertubuhan Muslimin sendiri tidak terus mengemukakannya kepada kerajaan ataupun membawanya kepada Majlis Penasihat Islam supaya dilaksanakan tujuan-tujuan itu?

Di dalam kertas kerja itu, tidak sedikit pun ada rancangan-rancangan yang disebut untuk mencari jalan menyatu padukan pertubuhan-pertubuhan dan umat Islam yang diharap akan dapat menimbulkan kerjasama yang erat di dalam usaha

untuk meninggikan taraf pemeluk-pemeluk Islam. Di dalam hal ini orang-orang kelak akan membuka pula sejarah dan bertanya bagaimanakah usaha-usaha dahulu tentang mengadakan empat serangkai (*Jamiyah*, PERGAS, Muhammadiyah dan Majlis Islam Penasihat Kerajaan?) apakah ini hanya untuk gembar-gembur sahaja seperti dahulu sedang natijah daripadanya tidak ada? Apakah riwayat gabungan badan-badan itu sesudah mengadakan perjumpaan menentang Qadiyani? Mana dasarnya selain daripada itu? Tidakkah orang lupa bahawa Encik Ya'kub sendiri pelopornya?

Dengan sebab-sebab itu masih ada orang-orang ragu-ragu atas adanya perkara yang gelojoh, mengadakan suatu muktamar dengan tidak lebih dahulu meminta fikiran, sekurang-kurangnya untuk mencari kerjasama di antara badan-badan itu, sebagai suatu perkara yang boleh menimbulkan syak orang-orang tertentu bertanya-tanya adakah sesuatu tujuan ? untuk ini orang masing-masing menunggu natijah atau akibat apa yang harus terjadi. Kalau baik disyukuri tetapi kalau hanya suatu gembar-gembur sahaja maka kelak akan nampaklah sunam apabila hilang sepuhnya.

\* \* \*

### **Undang-undang Mengenai Hal Ehwal**

#### **Nikah Cerai**

Boleh jadi kerana desakan daripada kaum ibu maka dikhabarkan, Majlis Raja-raja Melayu, akan merundingkan perkara mengenai dengan mengadakan hukum atau peraturan-peraturan yang mengenai hal ehwal nikah cerai. Asas-asasnya adalah seperti yang dijalankan oleh kerajaan Selangor.

Tujuan mengadakan ini adalah tentunya dengan niat hendak memperbaiki keadaan nasib kaum ibu di dalam masyarakat dan mehendaki pula jangan ada perkara-perkara yang